

Protocol dalla radunanza communal digl cumegn da Surses digls 7 d'avregl 2025 (nr. 01-2025)

Li ed oura	Sala Grava a Savognin, allas 20.00
Preschaints:	212 votantas e votants
Parsoura:	Daniel Wasescha, mastral
Actuar:	Beat Jenal, canzlist

1. Bavagnaint ed elecziun digls dombravouschs

Igl mastral benevainta las persungas preschaintas alla radunanza communal. Siva d'ena curta infurmaziun davart igl adiever digl lungatg e la practica da rediger e publitgier igl protocol dalla radunanza communal, constatescha igl mastral tgi la radunanza communal odierna seia neida convocada conform alla constituziun, uscheia tgi ella seia cumpetenta da decider.

Tractandas

01. Bavagnaint ed elecziun digls dombravouschs
02. Credit d'investiziun «construcziun veia d'equipaziun (part privata) e parcadis sen la surfatscha parziala da parcella nr. 3281, Viols, Savognin, an vista alla realisaziun digl resort da vacanzas Viols dalla RESalpina ScRL: credit d'object da CHF 948'000.00
 - a) Preschentaziun e discussiun
 - b) Approvaziun
03. Garanzeia dalla liquiditad dalla Center da Sanadad Savognin SA; conceder ena contribuziun agl menaschi à fonds perdu da CHF 2'000'000.00
 - a) Preschentaziun e discussiun
 - b) Approvaziun
04. Revisiun parziala dalla lescha da sepultura e santieri digl cumegn da Surses
 - a) Preschentaziun e discussiun
 - b) Approvaziun
05. Decret dalla lescha da pulizeia digl cumegn da Surses
 - a) Preschentaziun e discussiun
 - b) Approvaziun
06. Annullaziun dalla lescha davart igl adiever da fis artificials digl cumegn da Surses
 - a) Preschentaziun e discussiun
 - b) Approvaziun
07. Annullaziun digls regulativs da gôt digls anteriours cumegnans an Surses
 - a) Preschentaziun e discussiun
 - b) Approvaziun
08. Renovaziun dalla veia da gôt Plang Ses (project SIE 2025): credit d'impegn brut da CHF 1'476'000.00
 - a) Preschentaziun e discussiun
 - b) Approvaziun
09. Diversas infurmaziuns
10. Varia

Cunter la glista da tractandas na vignan fatgas nignas objecziuns, uscheia tgi chella vala scu approvada.

Scu dombravouschs vignan proponias Pedro de Oliveira, Adelio Demarmels, Mario Steier e Felix Guggenheim. Cunter chella proposta vignan fatgas nignas objecziuns.

2. Credit d'investiziun «construcziun veia d'equipaziun (part privata) e parcadis sen la surfatscha parziala da parcella nr. 3281, Viols, Savognin, an vista alla realisaziun digl resort da vacanzas Viols dalla RESalpina ScRL: credit d'object da CHF 948'000.00

Igl mastral infurmescha tg'igl project dalla RESalpina ScRL per la construcziun digl «Resort da vacanzas Viols» seia nia preschento gio a caschung dalla radunanza communal digls 18 da mars 2019. Perveia dalla gronda impurtanza digl project per la nosa regiun da vacanzas veva la radunanza communal decidia da conceder alla RESalpina ScRL, resp. agl investour, igl dretg da compra per la surfatscha parziala da 9'389 m2 dalla parcella nr. 3281, Viols, Savognin. A basa dallas directivas digl cumegn davart la promoziun da hotels e menaschis d'alloschamaint cun letgs administros, tgi valevan da chel taimp, vegia la radunanza communal concedia a madem taimp ena contribuziun finanziaria unica à fonds perdu da max. CHF 1.65 miu. alla RESalpina ScRL resp. agl investour per realisar igl project. Gio a caschung dall'approvaziun dalla fatschenta seia nia declaro tgi la planisaziun da detagl seia anc tgossa da tractativas cun igls sviluppaders digl project, ma tgi l'avertura generala dalla parcella e la construcziun digls parcadis vignan fatgs prubablamaintg digl cumegn.

Causa da recurs seia la realisaziun digl project nia blocco per onns. Gl'onn passo vegia la Dertgira federala refuso tot igls recurs ed uscheia do gleisch verda alla realisaziun, daclera igl mastral. La RESalpina ScRL resp. igl investour viglia ossa eriger igl resort da vacanzas Viols. An connex cun las tractativas ins seia sa cunvignia tgi l'avertura digl access agl resort Viols scu er la construcziun digls parcadis basignevels vigna fatg sen costs digl cumegn. La RESalpina ScRL stoptga pero sa participar agls costs.

Igl project dall'equipaziun cumpeggia d'ena vart la construcziun dalla veia publica per l'avertura generala dall'antiera parcella scu er per part d'ena veia privata. Dall'otra vart seiigl previa d'eriger anc 21 carports e totalmaintg 64 parcadis, infurmescha igl mastral. Igls costs dalla veia publica geian cumplagnamaintg a cost digl cumegn, perchegl tgi chella serva all'avertura dall'antiera parcella e betg angal digl resort da vacanzas. Chels costs na seian perchegl er betg cumpiglias aint igl credit d'object tgi stetta oz an discussiun, vign accentuo.

Agls costs da construcziun tgi pertotgan la part dalla veia e digls parcadis tgi sa cattan segl sies taragn privat, vegia la RESalpina ScRL resp. igl investour da sa participar cun ena somma unica da radond CHF 120'000.00, dependent digls costs da construcziun effectivs. Igls ulteriours parcadis e carports vignan dos a tschains agl gestiunari digl resort da vacanzas (tschains CHF 50.00 per meis/parcadi e CHF 90.00 per meis/carport). Uscheia possa igl cumegn chintar cun antradas da fittanza annualas da radond CHF 50'000.00.

Igls costs da construcziun per eriger la veia d'avertura privata e digls parcadis e carports montan tenor stema da costs da +/- 15% a radond CHF 948'000.00, precisescha igl mastral. Las carascheias tenor igl index digls costs da construcziun digl Uffezi federal da statistica (regiun gronda Svizra orientala) anfignen la finiziun dalla construcziun na seian betg calculadas ainten la stema da costs e possan neir fatgas valeir.

An vista alla realisaziun digl project mantga angal anc la decisiun oderna pigl credit da far l'avertura dalla parcella e digls parcadis e carports. Tot las otras decisiuns seian neidas pigleidas gio pi bod. Igls responsabels dalla RESalpina ScRL ansemen cun igl investour seian er gio stos a

Savognin ed i para tgi chels seian persvadias digl project e decidias da realisar igl resort da vacanzas a Savognin, concluda igl mastral las sias expectoraziuns.

Discussiun:

Dalla discussiun daverta na vign betg fatg adiever.

Resultat dalla votaziun:

Sen proposta dalla suprastanza decida la radunanza communal cun 174 cunter 3 vuschs d'approvar igl credit d'object da radond CHF 948'000.00 per la construcziun dalla veia d'avertura privata e per la construcziun da carports e parcadis an connex cun la realisaziun digl resort da vacanzas Viols a Savognin. La suprastanza communal vign incumbensada igl madem mument cun l'execuziun.

3. Garanzeia dalla liquiditad per la Center da Sanadad Savognin SA; conceder ena contribuziun da menaschi à fonds perdu da CHF 2'000'000.00

Igl mastral daclera tgi a caschung dallas occurrenzas d'infurmaziun digls 18 da settember 2024 e digls 2 da december 2024 ins vegia gio infurmo la populaziun davart la situaziun finanziaria precara dalla Center da Sanadad Savognin SA (CeSa). An chel connex seian er neidas preschentadas las cefras d'utilisaziun digl center da sanadad e propostas per soluziuns pusseblas, scu tg'ins savess migliurar la situaziun finanziaria resp. redutgier igl deficit.

Cun l'intenziun da garanteir er an futur igl mantignamaint d'en provedimaint medicinal da basa staziunar an Surses seia neida inoltrada la fegn d'otgover 2024 en'iniziativa digl pievel, sottascretga da passa 400 persungas cun dretg da votar. Aint igl decurs digl aton 2024 seia neida fundada er la cuminanza d'interess IG Center da Sanadad Savognin, cun la fegnameira principala da stgaffeir fidanza e da manar la Center da Sanadad Savognin SA cun forzas uneidas ainten en avigneir stabil.

Igl mastral infurmescha pinavant tgi la radunanza communal digls 9 da december 2024 vegia approvo igl preventiv communal pigl onn 2025. Chel cuntigna ena contribuziun da menaschi à fonds perdu da CHF 2 miu. alla Center da Sanadad Savognin SA. Chella contribuziun seia pero stada marcada cun ena clausula da bloccada, chegl viglia deir tgi la concessiun da chella contribuziun da menaschi vegia da neir approvada separadamaintg dalla radunanza communal, a taimp inditgia.

Ainten la situaziun actuala na covran las antradas mensilas betg las sorteidas mensilas. La CeSa vegia duvro se schinavant igls agens meds liquids, uscheia tgi vigna strètq mintga meis per paer las paias resp. igls chints. Per tgi la CeSa dispona puspe d'ena basa finanziaria suffizainta, dovra ella chella contribuziun da menaschi da 2.0 milliuns francs. Chella somma tanscha circa per 3 paias mensilas à CHF 0,5 miu. e ca. CHF 0,5 miu. per investiziuns tgi seian d'exequoir, daclera igl mastral. La contribuziun da menaschi vegian da prestar igls acziunaris dalla Center da Sanadad Savognin SA (96.74% cumegn da Surses e 3.26% cumegn d'Albula/Alvra). Per simplifitgier la procedura dumonda igl cumegn da Surses igl antier import da CHF 2 miu. e vigna metter a chint siva agl cumegn d'Albula/Alvra la sia part da CHF 65'200.00.

Alla fegn dallas sias expectoraziuns dat igl mastral ena survista digls commembers tgi fon part alla IG Center da Savognin, digls amprems sotsignias dall'iniziativa scu er digls commembers dalla direziun e digl cunsegl administrativ dalla CeSa SA. Pinavant seia er nia fundo ena giunta autonoma tgi vegia l'incumbensa da tschartger novs commembers pigl cunsegl administrativ an vista allas elecziuns a caschung dalla proxima radunanza generala dalla CeSa SA igl zarcladour 2025.

Siva dallas infurmaziuns digl mastral survignan las suandontas persungas l'egna siva l'otra igl pled:

- Luzi Thomann, an sia funcziun da coach, infurmescha per incumbensa digl cunsegl administrativ dalla CeSa Sa davart igl rapport an connex cun la situaziun actuala digl center da sanadad.
- Sandra Luzio, directoura ad intermin dalla CeSa SA, infurmescha davart igls camps d'acziun tg'ins ò definia an diversas sedutas igls meis passos per optimar l'organisaziun digl center da sanadad a Savognin.
- Stefan Schumacher, manader finanzas e controlling dalla CeSa, preschainta da moda concisa las cefras davart igl stgamgiamaint, igl resultat operativ digl onn passo scu er davart igl plan da liquiditad.

Avant da darveir la discussiun, dat igl mastral igl pled a Guido Luzio, egn digls amprens sotsignias dall'iniziativa, tgi metta a cor alla radunanza communal da sustignair igl center da sanadad.

Patric Vincenz, represchentant dalla IG Center da Sanadad Savognin, renda attent alla gronda muntada dalla CeSa per igl noss cumegn. Da cattar ena buna soluziun per saveir garanteir er an futur igl provedimaint da sandad na seia betg simpel, causa dalla cumplexitad.

En votant giaveischa da pudeir piglier invista dalla bilantscha dalla CeSa SA. Igl mastral infurmescha tgi tot igls rapports da gestiun dalla CeSA incl. la bilantscha seian activos sen la pagina d'internet dalla CeSA.

Oters votums na vignan betg fatgs.

Resultat dalla votaziun:

Sen proposta dalla suprastanza decida la radunanza communal cun 201 vuschs cunter 5 vuschs da conceder la contribuziun da menaschi à fonds perdu da CHF 2.0 miu. per garanteir la liquiditad an favour dalla Center da Sanadad Savognin SA.

Chest conclus ò da neir sottamess agl referendum facultativ.

4. Revisiun parziala dalla lescha da sepultura e da santieri digl cumegn da Surses

Igl affar vign preschento dad Irene Kolb, parsoura digl departamaint IV ed an chel senn responsabla tranter oter er per igls santieris. Ella infurmescha tgi la lescha da sepultura e da santieri digl cumegn da Surses seia neida messa an vigour igls 12 da december 2022.

Siva dall'antrada an vigour vegia cunzont igl art. 19 (silenzi dalla fossa) caschuno repeteidamaintg discussiuns, percheigl tgi tenor la lescha existenta dastgan urnas da tschendra neir sutteradas ainten ena fossa existenta anfignen maximum 15 onns siva l'amprema sepultura. La direcziun digl cumegn da Surses scu er la suprastanza communal vegian uscheia stuia negar ples dumondas per deposiziuns d'urnas da tschendra pi tard tgi 15 onns siva dall'amprema sepultura. Cotras ins vegia stuia decider ancunter igl davos giaveisch digls defuncts, cheigl tgi vegia caschuno nuntgapientscha e malcuntantientscha dalla vart digls confamigliars.

Percheigl vegia la suprastanza communal decida da piglier a mangs ena revisiun parziala dalla lescha da sepultura e da santieri existenta. Ultra dalla midada digl art. 19 duessan neir fatgas anc adattaziuns materialas ainten art. 7 (li da sepultura) ed art. 23 (taxas), cheigl sen fundamaint d'experientschas fatgas. A madem taimp vigna nizigeida l'ocasiun per far en pêr pitschnas adattaziuns formalas, daclera la suprastanta e preschainta an detagl las midadas materialas digls treis artetgels menziunos soura.

Siva cuntinuescha ella las sias explicaziuns cun accentuar tg'ins vegia infurmo ordavant er las suprastanzas digls cumegn-baselgia an Surses cun dar la pussebladad da piglier posiziun davart la revisiun parziala a caschung dalla radunanza communal odierna.

Avant da darveir la discussiun infurmescha suprastanta Irene Kolb er anc davart igl ulteriour proceder an connex cun la realisaziun dallas fossas comunablas sen tot igls santieris publics digl cumegn.

Discussiun:

Dalla discussiun daverta fon adiever dus votantas cun far differentas dumondas davart las midadas preschentadas. A tot chellas dumondas so la suprastanta rasponder per cuntantientscha dallas interrogatouras.

Ena terza votanta renda attent alla noscha figura tgi la fossa comunabla segl santieri da Savognin fetscha cun la supplica da la furmar en po migler. Suprastanta Irene Kolb peglia ancunter chell'intimizaziun.

Proposta dalla suprastanza communal

Sen proposta dalla suprastanza decida la radunanza communal cun 189 vouchs cunter 1 vouch d'approvar la revisiun parziala dalla lescha da sepultura e da santieri e da la metter an vigour per la data digl conclus.

5. Decret dalla lescha da pulizeia digl cumegn da Surses

Igl mastral infurmescha tgi blers cumegn aint igl cantun Grischun vegian relaschea leschas da pulizeia communalas. Igl cumegn da Surses na dispona anfignen ossa betg d'ena tala lescha da pulizeia. Dus puncts principals vegian intimo la suprastanza communal da relascher ossa er per igl cumegn da Surses ena lescha da pulizeia. D'ena vart duess neir reglo igl parcar sen taragn public e dall'otra vart duess neir dada la pussebladad da scumandar igl campar selvadi sen taragn communal e pussibilitar alla suprastanza communal a madem mument da definire ultra dallas zonas da camping ordinarias anc ulteriouras plazzas, noua tgi seia lubia da campar cunter taxa. Per reglar chels camps da temas dovrigl ena basa legala sen nivel communal, e chegl ins viglia far cun metter an vigour la lescha da pulizeia. Cun elaborar la lescha da pulizeia ins seia sa baso concernent igl campar allas disposiziuns legalas digls noss cumegn vaschigns Albula/Alvra e Silvaplana. Uscheia duess neir contanscheida ena practica unifitgeida, daclera igl mastral.

I fiss naturalmaintg er pussebel da relascher angal ena lescha davart igl campar sen territori communal ed en'otra lescha per igl parcar sen taragn public, precisascha igl mastral. Chegl na maness pero betg alla fegnameira tenor la suprastanza communal. Cun decretar la lescha da pulizeia dettigi la pussebladad da reglar - ultra dallas determinaziuns menziunadas all'antschatta pertutgont igl campar e parcar - er ulteriours camps da temas comunals, scu p.ex. igls taimps da pôss e l'obligaziun d'annunztgier igls tgangs. Da nov vigna reglo er igl scumond da fis artificials ainten la lescha da pulizeia. Uscheia ins possa annullar la lescha existenta davart l'utilisaziun da fis artificials digl cumegn da Surses, scu tractando ainten la proxima tractanda. Cun l'approvaziun e l'antrada an vigour dalla lescha da pulizeia preschainta per igl cumegn da Surses, vignan annulladas tot las disposiziuns digls anteriours cumegn tgi stettan an cuntradiziun cun chella.

Igl mastral preschainta an detagl igls suandonts artetgels:

- art. 12 - campar
- art. 23 - fis artificials, oters objects pirotecnics e gliternas sgulontas
- art. 29 - tigneir tgangs ainten la publicitad
- art. 31 - parcar sen taragn public

Discussiun:

La dumonda d'en votant davart la pussebladad da dar casteis directamaintg a basa dalla procedura da multa disciplinara so igl mastral declarar per cuntantientscha digl interrogatour. Treis oters votants peglian igl pled e s'expriman cunter la proposta dalla suprastanza da leir metter an vigour la lescha da pulizeia. Ena tala lescha porta angal daple scumonds. Scumonds tgi seian siva er da controllar. Chegl caschung a angal blera labour per l'administraziun communal e p.ex. er per igls menaschis da gastronomia. Ultra da chegl seia tgunsch da chintar cun daple costs pigl cumegn. I fiss sto impurtant da manar tras ordavant ena consultaziun per dar uscheia la pussebladad alla populaziun da s'infurmar e da piglier posiziun tar chella lescha da pulizeia, vign randia attent d'en votant. Igls treis oratours recumondan alla radunanza communal da refusar l'antrada an vigour dalla lescha da pulizeia.

Igl mastral punctuescha, tgi cun la nova lescha da pulizeia vignan betg mess an vigour daple scumonds. Ena gronda part dallas determinaziuns seia gio reglada da leschas surordinadas. Cun disponer d'ena lescha da pulizeia communal seia l'applicaziun pero pi simpla.

Oters votums na vignan betg fatgs.

Resultat dalla votaziun:

Ancunter la proposta dalla suprastanza communal decida la radunanza communal cun 114 vuschs cunter 69 vuschs da refusar l'antrada an vigour dalla lescha da pulizeia digl cumegn da Surses.

6. Annullaziun dalla lescha davart igl adiever da fis artificials aint igl cumegn da Surses

Causa tgi la radunanza communal vegia refuso l'antrada an vigour dalla lescha da pulizeia digl cumegn da Surses, scroda la decisiun davart l'annullaziun dalla lescha davart igl adiever da fis artificials, daclera igl mastral.

7. Annullaziun digls regulativs da gôt digls anteriours cumegns an Surses

Igl mastral daclera tgi siva dalla fusiun digls cumegns uriunds seia nia relaschea nign regulativ da gôt per igl cumegn da Surses. Uscheia seian igls regulativs da gôt digls cumegns anteriours Bivio, Cunter, Mulegns, Marmorera, Riom-Parsonz, Salouf, Savognin, Sur e Tinizong-Rona anc adegna an vigour. An vista ad ena harmonisaziun digls regulativs da gôt vegia igl Uffezi da gôt e prievels dalla nateira UGP/AWN infurmo, tgi igl cumegn da Surses na vegia betg da relascher en agen regulativ da gôt, cunche gl tgi la legislaziun da gôt surordinada regla tot igls fatgs digl gôt. Per tala raschung cunsegla igl UGP/AWN d'annullar igls regulativs da gôt digls cumegns anteriours e d'igls metter ord funcziun, sainza substituziun.

Naturalmaintg possa igl cumegn relascher sen giaveisch en regulativ da gôt per igl cumegn da Surses, sch'ins viglia reglar tschertas disposiziuns sen plang communal. La suprastanza communal an consultaziun cun igl manader digl sarvetsch forestal seia pero neida alla conclusiun tgi chegl na seia betg basignevel. Igls regulativs da gôt d'anfignen ossa seian antiquos e servan betg ple allas circumstanzas d'ozande. Las disposiziuns singulas scu per exaimpel pertutgont rimnar roma u retrer lenna da biagier per igl agen adiever, vignan tractadas e liquidadas ozande aint igl affar da mintgade digl sarvetsch forestal, terminescha igl mastral las sias expectoraziuns.

Discussiun:

Sen la dumonda d'en votant schi na fetscha betg senn da reglar tscherts fatgs da gôt ainten en agen regulativ communal, rasponda igl mastral tgi chegl fiss bagn pussebel, seia pero betg basiglevel cuncheigl tgi la lescha da gôt surordinada regla gio tot chegl tgi seia necessari.

Resultat dalla votaziun:

Sen proposta dalla suprastanza decida la radunanza communal cun 192 vuschs cunter 1 vusch d'annullar igls regulativs da gôt da tot igls cumegnans anteriours, sainza substituziun, e da metter chels incl. eventualas determinaziuns accumpagnontas ord vigour per data digl conclus.

8. Renovaziun dalla veia da gôt Plang Ses (project SIE 2025): credit d'impegn brut da CHF 1'476'000.00

Suprastanta Irene Kolb daclera tgi causa d'ena crudada da crappa la premaveira 2023 seian rots dus meirs per lung dalla veia da gôt Plang Ses, ed igl material vegia er stratg cun el ena part dalla veia. Siva da chegl seia chella veia sarada per tot igl travagl ord muteivs da siertad. Ena reparatura seia urgenta.

La veia equipescha igl Gôt da Ses, tgi seia classificata per gronda part scu gôt da schurmetg A, scu er las ovras da protecziun digl territori HB Crap Ses (UVIAS/ASTRA) Nr. 2272. I vignan betg equipos pros agricols cultivos u alps. La veia vegia angal ena pitschna muntada turistica. I sa tracta damai d'ena veia tgi serva ple u manc angal agl adiever forestal.

An consequenza da maseiras da regiuvinaziun seeigl da chintar durant igls proxims 40 onns cun ena somma da lenna da radond 6'000 m³, chegl tgi corresponda ad en adiever annual da radond 150 m³.

A basa digls numerous meirs sitgs dalla vart sot, tgi seian nias erigias per gronda part tots durant igl madem taimp, seia neida fatga, per incumbensa digl cumegn, ena inventarisaziun scu er en studi da variantas cun maseiras da reparaziun pusseblas per igls tschancungs pertutgias. Sen fundamaint da chella inventarisaziun vegia la suprastanza communal decidia da sanar la veia da gôt, resp. da ramplazzar ena part digls totalmaintg 32 meirs da sustign dalla vart sot, da renovar en conduct d'ava da sfundrada scu er da ramplazzar la construcziun da rastel d'en tumbign d'antrada.

Igl cumegn da Surses seia igl proprietari d'ovra da chellas construcziuns artificialas ed uscheia obliia da garanteir igl mantignamaint e la siertad da chellas, precisescha la suprastanza. La renovaziun seia necessaria percheigl tgi chella veia da gôt serva alla cultivaziun digl perimeter digl gôt da schurmetg. I na vigna damai betg an dumonda da renaturalisar la veia, percheigl tgi schiglio seia la cultivaziun betg ple pussebla da maniera effizianta.

La fegnameira principala digl project seia igl mantignamaint a lunga vista dall'abilitad da funcziun ed utilisaziun dall'equipaziun existenta, scu er da garanteir la siertad da carar. Las maseiras da reparaziun vegian da neir adattadas optimalmaintg allas cundiziuns, cun risguardar er igl aspect economic. Cun la reparatura digls amprens treis objects duess neir elimino a lunga vista igl prievel da crappa tgi rodla perveia digls meirs rots anfignen sen la veia naziunala giusot.

Tar igl preventiv elaboro uriundamaintg per la reparaziun dalla veia da gôt Plang Ses ins seia ia or da costs da radond CHF 800'000.00. Siva la deducziun dalla contribuziun cantunala messa an vista da 68% vessan munto igls costs nets per igl cumegn radond CHF 272'000.00. Chella somma seia er neida integrada aint igl preventiv 2025 digl chint economic digl cumegn da Surses e neida approvada igls 9 da december 2024 dalla radunanza communal.

Igl december 2024 ins vegia scretg or las lavours an en proceder da submissiun public. I seian antradas 5 offertas, infurmescha suprastanta Irene Kolb. Siva la publicaziun vegia igl preventiv gia da neir adatto aint igl rapport tecnic, surtot percheigl tgi igls costs dall'installaziun dalla piazza da biagier, digl betun e dalla crappa da rampar seian s'augmentos. Igl preventiv actual vegia ena exactezza da +/- 20% e monta a radond CHF 1'476'000.00. La regenza cantunala vegia approvo igls 11 da mars 2025 igl project collectiv «reparaziun equipaziun e prevenziun d'incendi da gôt 2025», accentuescha la suprastanta. Aint igl rom da chest project collectiv vigna la reparaziun dalla veia da gôt Plang Ses sustigneida a basa dalla sia muntada forestala cun ena contribuziun cantunala da 68%. Igl costs nets digl cumegn montan uscheia siva la deducziun dalla contribuziun cantunala a radond CHF 475'000.00 e surpissan uscheia la competenza finanziaria dalla suprastanza communal.

Las carascheias tenor igl index digls costs da construcziun digl Uffezi federal da statistica (regiun gronda Svizra orientala) anfignen la finiziun dalla construcziun na seian betg calculadas aint igl preventiv e possan neir fatgas valeir.

Discussiun:

En votant dumonda sch'igl cumegn vegia da purtar sulet igls costs nets u schi dess betg la pussebel da vurdar per en sponsoring. La nossa lenna vigna duvrada surtot dalla rezgia dalla Resurses SA. La suprastanta daclera tgi seia cler e net l'incumbensa digl cumegn da cultivar igl gôt ed an chel senn vegia igl cumegn er da purtar igls costs.

Oters votums na vignan betg fatgs.

Resultat dalla votaziun:

Sen proposta dalla suprastanza decida la radunanza communal cun 176 cunter 5 vuschs d'approvar la dumonda da credit brutta da CHF 1'475'640.00 per la reparaziun dalla veia da gôt an direcziun Plang Ses. A madem mument vign la suprastanza communal incumbensada cun l'execuziun.

9. Diversas infurmaziuns

Igl mastral infurmescha davart igls suandonts temas:

- seira d'infurmaziun davart igl center da transit per asilants ed asilantas a Marmorera igls 29-04-2025, allas 20.00, an sala polivalenta a Beiva;
- infurmaziun davart la revisiun totala dalla planisaziun locala igls 22-05-2025 an sala polivalenta a Salouf;
- infurmaziun planisada davart igl concept da traffic Savognin/Grava la fegn da matg antschatta zarcladour;
- termin digl cumegn d'urna igls 18-05-2025;
- igls treis grond projects da construcziun digl cumegn seian sen buna veia:
 - nova tgesa da scola Grava, Savognin
 - luvratori communal a Davos Fallung, Savognin
 - renaturalisaziun dalla regiun alluvieida Curtegn a Radons;
- curta survista davart igl stadi dallas lavours an connex cun igl plan da legislatura:
 - resort da vacanzas Viols: lavours da construcziun antschevan l'otr'onn
 - hotel Mövenpick: la realisaziun è anc adegna an discussiun
 - hotel Cube: cò parigl da dar ena schliaziun
 - introducziun digl management da qualitat conc. l'infrastructura turistica e communal
 - project conc. la concessiun dallas ovras electricas Tinizong e conc. igl dulzamaint digl rampar da Marmorera: las discussiuns marschan davos las culissas

- structuraz e process digl cumegn da Surses vignan optimadas successivamaintg e la digitalisaziun vign sfurzada.

10. Varia

Divers votants peglian igl pled, sainza dumandar tgi lour noms e votums vignan protocolos. Tgavazzigns digls votums:

- igl turissem da stad vigna veapi impurtant. Recumandaziun d'approvar igl credit pigl Juliertrail, davart igl qual i vign voto igls 18-05-2025 all'urna;
- igls 10 d'avregl organisescha la PLD a Beiva ena seira d'infurmaziun davart igl Juliertrail;
- sponsoring dad ewz per l'arena da sport. I dastga betg esser tgi igl cumegn sa metta an ena situaziun da dependenza cun ewz an vista alla dumonda digl return agl proprietari dall'ovra electrica Tinizong;
- las tavlas da reclama an cumegn na fetschan nigra parada e stuessan neir ramplazzadas;
- ins sainta ainten la populaziun ena malcuntantezza per tschertas decisiuns dalla suprastanza communal. La gliout sa sainta veapi gliunsch davent dalla suprastanza. Intimaziun d'installar en parlamaint per elaborar tscherts affars, scu p.ex. la lescha da pulizeia;
- a Beiva seia sa ruschnada ena sponda aint igl gôt. La loipa seia pertutgeida da chegl.
- I vign pretandia trasparenza an connex cun la contribuziun da promoziun tg'igl cumegn ò concedia per sanar igl hotel Danilo a Savognin. Cun tge import ins ò sustignia igl hotel Danilo? Vign pretandia anavos ena part dalla contribuziun, savond tgi igl hotel seia sto saro per gronda part ed i geia ossa la fama tgi igl hotel vigna vandia? A chellas dumondas vign giavischia ena rasposta an scretg.

Igl mastral sera la radunanza communal allas 22.20 cun angratzger per la participaziun e giaveischa a tots e tottas en bung arrivo a tgesa.

Tinizong, igls

Igl mastral:

Daniel Wasescha

Igl actuar:



Beat Jenal